

## Part doi - El sistema òtich

An costa part i comensoma a parlé 'd lent, e an particolar dl'aprossimassion dla "lent sutila". I vardoma peui cos a l'é un sistema òtich e sò model geométrich. I vardoma j'angrandiment e la formassion dj'imàgin an cola che as dis "aprossimassion èd Gauss". Dòp avèj vist ij sistema con feu, i vardoma ij sistema afocaj ò telescopich. Peui i tratoma d'aberassion dij sistema òtich reaj. A la fin i disoma quaicòs an sle fibre òtiche.

### TÀULA DLA SCONDA PART

El sistema òtich.....	119
Le lent.....	119
Lent sutila .....	120
Teorìa dij sistema òtich ideaj.....	121
Modél geométrich .....	121
Ij métod pér costruve j'imàgin.....	123
Costrussion dl'imàgin .....	124
Posission dl'imàgin e angrandiment trasversal .....	125
Angrandiment angular .....	126
Formassion dl'imàgin pér na lent sutila .....	129
Ogét reaj.....	129
Ogét virtuaj .....	132
Convergensa 'd na lent.....	133
Ogét tridimensionaj .....	134
Sistema afocaj ò telescopich .....	135
J'aberassion geométriche .....	136
Aberassion dë sferissità .....	136
Aberassion èd còma.....	137
Astigmatism .....	137
Curvadura dël camp.....	138
Dëstorsion .....	139
L'aberassion cromàtica .....	139
Coression dj'aberassion geométriche .....	141
Aberassiod dë sferissità .....	141
Aberassion èd còma.....	143
Astigmatism e curvadura dël camp .....	143
Fibre òtiche .....	145
Guide 'd lus .....	145
Fibra òtica a scalin d'índes d'arfrassion .....	145
Fibra òtica a ìndes gradual.....	146
Duvertura numérica.....	147

TÀULA DLE FIGURE DLA SCONDA PART

Figura 1 - Sistema òtich .....	119
Figura 2 - Lent sutilà .....	120
Figura 3 - Ragg e pont coniugà .....	122
Figura 4 - Ragg omòlogh .....	123
Figura 5 - Costrussion dl'imàgin .....	124
Figura 6 - Distanse e àngoj .....	125
Figura 7 - Pont e pian nodaj .....	128
Figura 8 - Imàgin pér na lent sutila .....	129
Figura 9 - Lent conca .....	130
Figura 10 - Imàgin dàita da na lent conca .....	131
Figura 11 - Ogét an sël pian focal èd na lent convessa .....	131
Figura 12 - Ogét fra feu e lent (lent convessa) .....	132
Figura 13 - Prim tipo d'ogét virtual .....	132
Figura 14 - Second tipo d'ogét virtual .....	133
Figura 15 - Relassion fra posission e àngoj .....	133
Figura 16 - Angrandiment longitudinal anfinitésim .....	134
Figura 17 - Sistema telescopich .....	135
Figura 18 - Aberassion dë sferissità .....	136
Figura 19 - Aberassion èd còma .....	137
Figura 20 - Astigmatism .....	138
Figura 21 - Curvadura dël camp .....	138
Figura 22 - Dëstorsion .....	139
Figura 23 - Aberassion cromàtica .....	139
Figura 24 - Coression dl'aberassion cromàtica .....	140
Figura 25 - Variassion dla posission dël feu con la frequensa .....	141
Figura 26 - Dëstribussion dj'arfrassion fra surfasse .....	141
Figura 27 - Pont èstigmàtic .....	142
Figura 28 - Guida 'd lus a lente e specc .....	145
Figura 29 - Fibra òtica con ìndes a scalin .....	145
Figura 30 - Fibra curvà, efét an sl'àngol límit .....	146
Figura 31 - Ragg èd luss ant na fibra con ìndes n gradual .....	147
Figura 32 - Duvertura numérica .....	148

## ËL SISTEMA ÒTICH

Fin-a sì i l'oma vardà j'element che a son d'interésse ant l'òtica, pérchè a anteragisso con ij ragg luminos, e i l'oma vist-ne 'l comportament. Adéss i tratoma dla combinassion éd costi element pér oten-e d'arzultà che a ven-o a taj an vaire aplicassion.

As dis "*sistéma òtich*" , an general, na sucession éd diòtr pian e sférich, arfangent ò arbatent, andova l'imàgin formà da un diòtr a serv coma ogét al diòtr ch'a ven dòp.

Pér ilustré un sistema òtich is arferima a figura 1, andova i l'oma na sucession éd diòtr arfrangent e andova a son indicà le diferente imàgin prodòte a parte da l'ogét real  $Q$  fin-a a l'imàgin real  $Q'$ . Com as fà sovens, i vardoma la strà ch'a fan doi ragg qualunque che a parto da l'ogét. An costa manera i podoma vèdde andova as formo j'imàgin tant reaj coma virtuaj.




Figura 1 - Sistema òtich

L'ogét, d'autëssa  $y$ , a l'é arpresentà da la fletia che a finiss ant ël pont  $Q$ . Ij color dij doi ragg arpresentà a servo mach a nen confonde ij ragg midem e a l'han gnente da fé con ël color dla lus, che s' i consideroma 'ncora monocromàtica.

Ël prim diòtr a forma l'imàgin real  $Q_1$  fasend converge ij ragg an col pont, che a fà da ogét a lë scond diòtr. Cost, però a fà diverge ij ragg coma se a rivéissó an sël ters diòtr partend dal pont  $Q_2$ , che donca a arpresenta n'imàgin virtual che a fà da ogét at ters diòtr. Se sto ters diòtr a fussa l'ùltim dël sistema, as formerà n'imàgin real ant ël pont  $Q_3$ . L'assion dël quart diòtr a l'é cola 'd devié ij ragg an manera 'd formé l'imàgin real  $Q_4$ , e donca 'd trasformé  $Q_3$ , che a sta mira i podoma consideré n'imàgin virtual, an  $Q_4$ .

L'angrandiment trasversal dël sistema  $G_t$  a sarà sempe 'l rapòrt dla longëssa trasversal final su la longhëssa trasversal inissial. Donca :

$$G_t = \frac{y'}{y} = \frac{y_1}{y} \frac{y_2}{y_1} \frac{y_3}{y_2} \frac{y'}{y_3}$$

As peul sùbit vèdde che l'angrandiment trasversal total dël sistema a l'é 'l prodòt dj'angrandiment trasversaj dij diòtr. Cost a l'é un teoréma general che a val pér tuti ij sistema òtich.

## Le lent

An general le lent a son na sucession éd diòtr èsférich arfrangent con ij senter éd curvadura che a stan tuti an 's l'istéss ass (cost a l'é un "*sistéma òtich sentrà*"). L'ass midem a ven donca ciamà "*ass òtich dël sistema*".

Se la lent a l'é fàita da mach doe surfasse arfrangente a ven ciamà "**lent sèmpia**", dësnò a ven ciamà "**lent compòsta**".

Se lë spessor dla lent (misurà an 's l'ass òtich) a l'é cit (quàich milim) as peul consideré che la lent a sia un pian pérpendicolar a l'ass òtich, e su sto pian a-i son le deviassion dij ragg òtich che a incido an 's la lent. Costa aprossimassion a l'é ant l'órdin èd cole che as fan ant l'òtica geométrica. An sto cas as parla èd "**lent sutìla**", dësnò, fòra 'd sòn, as trata èd "**lent spëssa**" e l'aprossimassion dita a và pì nen bin.

## Lent sutìla

I vardoma com a peul esse dëscrivù 'l comportament èd na lent sutìla. I suponoma che na lent sutìla con ìndes d'arfrassion  $n$  a sia butà ant l'ària con ìndes d'arfrassion  $n \geq 1$ . Is arferima a figura 2, andova 'l pian  $\pi$  (indicà con soa trassa normal a l'ass òtich) a arpresents la lent.




Figura 2 - Lent sutìla

I consideroma che sta lent a l'é fàita da doi diòtr èsférich che a l'avran ragg  $R_1$  e  $R_2$ . Ij ragg che a seurt da l'ogét  $P$  a formo na prima imàgin  $P_1$ , dàita dal prim diòtr, e peui l'imàgin  $P'$  dàita da lë scond diòtr. Ste imàgin a peulo esse virtuaj ò reaj an fonsion dël valor dij ragg e dla posission dl'ogét. An figura  $P_1$  a l'é virtual e  $P'$  a l'é real.

I l'oma dit che j'ìndes d'arfrassion a son  $1$  pér l'ària e  $n$  pér èl veder. J'equassion dij doi diòtr, com i l'oma vist, a son donca :

$$\frac{1}{p} + \frac{n}{p_1} = \frac{n-1}{R_1} \quad ; \quad \frac{n}{p_1} + \frac{1}{p'} = \frac{1-n}{R_2}$$

e sòn pérchè i podoma trascuré lë spessor dla lent.

Adissionand ste doe equassion as oten :  $\frac{1}{p} + \frac{1}{p'} = (n-1) \left( \frac{1}{R_1} - \frac{1}{R_2} \right)$ . As peul sùbit vëdde

che ij doi feu  $F_1$  e  $F_2$  a son an posission simétrica rispét al pian  $\pi$  (arcordand la régola dij segn) e che le distanse focaj  $f_1$  e  $f_2$  a son :

$$f_1 = f_2 = f = (n-1) \left( \frac{1}{R_1} - \frac{1}{R_2} \right)$$

I l'oma 'dcò vist che  $x \cdot x' = f^2$ . Èl pont andova l'ass òtich a traversa 'l pian p a l'é "**senter òtich dël sistema**".

## Teoria dij sistema òtich ideaj

Un qualunque strument òtich a l'é fait da na sucession èd diòtr e surfasse ch'a arbato. An costa sucession, èd sòlit, as nùmero ij mojen traversà con nùmer che a chérso man man che a son ancontà dal ragg èd lus. Èdcò parèj as fà con le surfasse arfrangente ò arbatente.

Ant èl prim mojen a-i é la sors dij ragg, mentre ant l'ùltim ij ragg a seurto dal sistema a formé l'imàgin che a peul esse real opura virtual. Dal moment che ij ragg a son invertibij, se as cambia la diressioñ ai ragg che a seurto, tuti ij ragg as èscambio giusta la fision anvertend èl vers an's l'istéss diressioñ. Coj incident a dvento emergent.

Se i pijoma un ragg incident emèttu da un pont  $A$  ant èl prim mojen, as treuva an sucession ij diferent ragg arbatù opura arfràit ant ij mojen sucessiv, fin-a a trové un ragg emergent ant l'ùltim mojen. Ij ragg ch'a parto da  $A$  ant èl prim mojen a l'han donca 'i corispondent ragg emergent coniugà ant 'ùltim mojen.

Ma ij ragg che as oten-o coma ragg coniugà dij ragg incident che a parto dal pont  $A$ , an general a concoro nen tuti ant l'istéss pont. Se sòn a càpita, vis-a-dì se cand a na stèila 'd ragg che a parto da  $A$  a corispond na stèila 'd ragg emergent che a concoro ant èl pont  $A'$ , antlora i podoma dì che 'l pont  $A'$  a l'é " *l'imàgin stigmàtica* " dël pont  $A$ .

An realità as peul dimostré che mach an cas ecessional as riva a oten-e n'imàgin stigmàtica véra, e 'd sòlit as oten n'imàgin che a l'é mach stigmàtica an manera aprossimà. Sòn a ven da tute le aprossimassion ch'i l'oma suponù prima, e nen mach da le aprossimassion dle realisassion dj'element òtich dovrà. Macassia i vardoma ij mecanism èd formassion èd n'imàgin stigmàtica, tnisend-se ant l'aprossimassion èd Gauss. A l'é lòn ch'i l'oma già fait con èl diòtr èsférich.

I vardoma donca le proprietà dij *sistema òtich ideaj*, che a son andipendent da la strutura dij diòtr che a-j formo e che donca a l'han na validità general.

## Modél geométrich

I podoma dì che un sistema òtich ideal a stabiliss na corispondensa bi-unívoca fra ij pont dlë spassi ogét e ij pont dlë spassi imàgin. An sto modél sti doi spassi as considero spassi geométrich sovrapòst (i podoma 'dcò pensé a doe classe 'd pont).

Un pont ch'a sia considerà coma pont èd concorensa 'd ragg incident (i podoma dì : sors dij ragg) a aparten a lë spassi ogét. Un pont che a peussa esse pont èd concorensa 'd ragg emergent (ò sò prolongament) a aparten a lë spassi imàgin.

Sta corispondensa a l'é n'*omografia* ò *projetività*. An efét, se i l'oma pont dlë spassi ogét  $A$ ,  $B$ ,  $C$  ... e via fòrt, che a son an 's na riga drita, ij corispondent pont  $A'$ ,  $B'$ ,  $C'$ , ... ant lë spassi imàgin, a son sempe 'ncora an 's na riga drita.

Sòn as dimostra pensand che se su un ragg incident a-i é 'l pont  $A$ , an 's èl corispondent ragg emergent a venta ch'a-i sia 'l pont  $A'$ , dal moment che as trata d'un pont èd col ragg. Sòn a val pér qualònque ragg ch'a passa pér  $A$ . Ma sòn a val èdcò pér ij pont  $B$  e  $C$ . Se antlora i consideroma 'l ragg incident ant èl pian ogét che a conten ij pont  $A$ ,  $B$ ,  $C$ , l'omònim ragg emergent a conten ij pont  $A'$ ,  $B'$ ,  $C'$ . I podoma dì, an general, che a un pont e na riga drita che as apartèn-o ant lë spassi ogét a corispond un pont e na riga drita che as apartèn-o ant lë spassi imàgin.

A sta mira i podoma 'dcò dì che a un pian ant lë spassi ogét a corispond un pian ant lë spassi imàgin, e che an stì pian a valo le dipendense fra pont e righe drite omòloghe.

Al pian a l'anfinì ant le spassi ogét a corispond un pian  $\pi_F$  ant lë spassi imàgin, che a ven ciamà " *second pian focal* " dël sistema. A l'istessa manera, al pian a l'anfinì ant lë spassi imàgin a corispond un pian  $\pi_F$  ant lë spassi ogét, che a ven dit " *prim pian focal* " dël sistema.

Sti pian focaj a podrò esse nen pròpri, ma se i-j consideroma coma pian pròpri, as peul vèdde sùbit che le doe righe drite a l'anfinì dë sti doi pian as corispond. La reta intersession dël pian  $\pi_F$  con él pian a l'anfinì dlë spassi ogét, an efét, a corispond a la reta intersession dël pian  $\pi'_F$  con él pian a l'anfinì dlë spassi imàgin, e sòn a veul dì che pian paraléj ant lë spassi ogét a corispond a pian paraléj ant lë spassi imàgin.

Se i consideroma un sistema diòtrich sentrà fàit da surfasse arfrangente, dàita la simetria assial dël sistema, i podoma dì che ij doi fass ampròpri 'd pian paraléj ai pian focaj ant ij doi spassi, a son paraléj fra 'd lor e ortogonaj a l'ass èd simetria.

L'ass èd simetria, peui, a taja an manera ortogonal tute le surfasse dij diòtr, e donca, coma ragg incident, a l'ha coma omòlogh chièl midem. Donca ai pont èd l'ass a corispond 'ncora pont èd l'ass, che a ven ciamà "**ass òtich dël sistema**".

Sta simetria assial an pèrmëtt èd fé tute nòstre considerassion an 's un pian qualunque che a conten-a l'ass òtich.

Is arferima a figura 3, e i comensoma a consideré, ant lë spassi ogét, él fass èd ragg paraléj a l'ass òtich. Sti ragg a l'han coma omòlogh, ragg che a concorò tuti ant él pont  $F'$  dl'ass òtich, ciamà scond feu dël sistema e che a venta ch'a aparten-a a lë scond pian focal. A l'stéssa manera se i consideroma ij ragg paraléj a l'ass ant lë spassi imàgin i rivoma a la definission dël prim feu  $F$ , che a sarà un pont dël prim pian focal.




Figura 3 - Ragg e pont coniugà

La projetività fra spassi-ogét e spassi-imàgin a produv, su righe drite omòloghe, na corispondensa projetiva fra rete pontegià. An particolar i notoma che l'ass òtich a l'é na riga drita auto-coniugà e che donca a esist na projetività fra rete pontegià sovrapòste, che a l'ha ij feu coma pont limit, ant él sens che cand un pont an 's na pontegià a và vers l'anfinì, sò corispondent ant la projetività as avzin-a al feu, andova a riva al lìmit.

Se, antlora, i consideroma ij pont ogét  $A$  e  $B$  e i ciamoma  $x_A$  e  $x_B$  soa distansa dal feu  $F$ , sti pont a l'avran  $A'$  e  $B'$  coma imàgin corispondente, che a saran, ant l'ordin, a le distanse  $x_A'$  e  $x_B'$  dal feu  $F'$ . Ant na projetività fra righe drite pontegià i l'oma che 'l prodòt dle distanse dai pont limit èd doi pont coniugà a l'é na costant, e donca i l'avroma che :

$$x_A \cdot x'_A = x_B \cdot x'_B = k$$

com i l'avò già vist prima.

A-i é na diferenza fra le righe drite an sens projetiv e ij ragg luminos. Costi ùltim, an efét, a l'han un vers dont a venta ten-e cont, e donca a sarò pitòst righe drite orientà. Ant l'òtica ij doi vers èd na riga drita a son different da na mira fisica, e donca un sistema òtich a stabiliss doe corispondense projective differente. As peul oten-e un-a dle doe an stabilend èl vers su ognidun-a dle rete e ant ij sistema sentrà sto vers a peul esse arferì an vers stabilì an 's l'ass òtich. Se as anvert èl sens èd tuti ij ragg as oten l'àutra projectività.

Ant ij sistema sentrà ch'i consideroma sì i l'oma già vist che ij pian normaj a l'ass (ciamà "pian ed front") ant lë spassi-ogét a l'han coma corispondent ant lë spassi imàgin èd pian che a son ancora normaj a l'ass. Le rete a l'anfinì èd costi pian a coincido con cola dij pian focaj e i podoma dì che le rete a l'anfinì èd doi pian èd front as corispondono. Sòn a veul dì, an geometrià projectiva, che fra rete e pont èd doi pian èd front la corispondensa a l'é n'afinità, e a rason dla simetria antorna a l'ass st'afinità a dventa na similitùdin.

Doe figure omòloghe su doi pian èd front coniugà (l'ogét e soa imàgin) a son doncà sìmij fra 'd lor. Fra le doe a-ié un rapòrt èd similitùdin che, an tratand èl segn con convention ch'as conven-o, a ven ciaà "**ingrandiment linear**" relativ a la cobia 'd pian considerà.

A la fin i osservoma che le rete e ij pont che a son contnù an 's un pian ch'a passa pér l'ass òtich a l'ha coma coniugà rete e pont an sl'istéss pian. Un pian parèj a l'é dit "**unì**".

## Ij métod pér costruve j'imàgin

I suponoma che nòstr sistema òtich, sentrà e compléss com as veul, a sia comprès ant na nivola sentrà an 's l'ass òtich e i suponoma che sto sistema a sia formà da un nùmer qualunque 'd surfasse arfrangente.

I suponoma peui d'esse sempe ant le condission che an përmëtto 'd dovré la teorìa 'd Gauss, vis-a-dì che ij ragg a son para-assiaj con àngoj  $\alpha$  rispét a l'ass òtich taj che  $\alpha = \text{sen } \alpha = \text{tg } \alpha$ , e nen trop lontan da l'ass òtich midem. Pér èl moment i consideroma  $n$  coma ìndes d'arfrassion dlë spassi ogét e  $n'$  l'indes d'arfrassion dle spassi imàgin.

I vardoma antlora figura 4 e i comensoma a consideré, ant lë spassi ogét, un ragg incident AM paralél a l'ass òtich.




Figura 4 - Ragg omologh

Sto ragg a ven devià dal sistema, e a l'ha coma ragg omòlogh ant lë spassi imàgin, un ragg emergent anclinà e che donca a taja l'ass òtich ant un pont  $F'$  che i ciamoma "second feu" dël sistema. Sto ragg (ò sò prolungament) a 'ncontra 'dcò la riga drita ch'a conten èl ragg  $AM$  ant un pont  $M'$ . Da sto pont i foma passé 'l pian  $\pi'$  normal a l'ass òtich.

Adéss i consideroma n'àutr ragg che i pijoma coma emergent ant lë spassi imàgin, sempe paralél a l'ass òtich e i lo ciamoma  $N'B'$ , pijand  $N'$  an sël pian  $\pi'$ . Un ragg che a seurta dal sistema, ant lë spassi imàgin, paralél a l'ass òtich, a venta ch'a l'abia, com i l'oma vist, un ragg omòlogh incident  $FN$ , ant lë spassi ogét, che a passa pér èl "prim feu"  $F$  an sl'ass òtich.

Sto ragg incident  $FN$  a sarà anclinà rispét a l'ass òtich, e donca a crosia 'dcò la riga drita che a conten èl ragg  $N'B'$ . I ciamoma  $N$  sto pont èd crosiera (i spostoma lì èl pont che an servìa a indiché 'l ragg). Da sto pont  $N$  i consideroma 'l pian  $\pi$  normal a l'ass òtich. Ij pian  $\pi$  e  $\pi'$  a son pian èd front (normaj a l'ass òtich) e a son dit "**pian prinsipaj**". Ij doi pont  $P$  e  $P'$  andova l'ass òtich a crosia ij pian prinsipaj a son ciamà "**pont prinsipaj**".

Da na mira òtica i podoma consideré sti pian coma ij confin èd nòstr sistema, vis-a-dì ij pian che a comprendo lë spassi andova a càpito le deviassion dij ragg.

Pér com i l'oma definì costi pian  $\pi$  e  $\pi'$  a l'é imedià conclude che, se i tiroma na paralela qualunque a l'ass òtich, costa a andividoa su sti pian doi pont che a son omòlogh. Donca an nòstra figura  $M$  a l'é omòlogh èd  $M'$  e  $N$  a l'é omòlogh èd  $N'$ .

An costa manera i podoma dì che fra lë spassi ogét a snistra dël pian  $\pi$  e lë spassi imàgin a drita dël pian  $\pi'$  a esist na projetività an sl'ass, dal moment che, an pràtica, i l'oma trovà tre cobie 'd pont omòloghi.

## Costruzione dl'imàgin

A sta mira i podoma stabilì na manera general pér costruve l'imàgin èd n'ogét che as treuva an s'un pian èd front ant lë spassi ogét, e che pér adéss i schematisoma con na fletia normal al pian òtich (i arcordoma che la longhëssa dla fletia a l'é considerà cita, pér sté ant l'aprossimassion èd Gauss). I vardoma figura 5, andova i foma la costruzione dl'imàgin dël pont  $A$ .




Figura 5 - Costruzione dl'imàgin

As pijo doi ragg che a seurto da  $A$  ant lë spassi ogét e as vödd andova a van a concore ij ragg omòlogh ant lë spassi imàgin. I savoma traté an manera bin fàcil ij ragg paralél a l'ass òtich e coj ch'a passo pér èl feu  $F$ , e donca i consideroma sti doi ragg ch'a seurto da  $A$ . I l'oma 'l ragg  $AM$  paralél a l'ass òtich, che a riva al pian  $\pi$  giusta an  $M$ . L'omòlogh dël pont  $M$ , an sël pian  $\pi'$ , a l'é  $M'$ , che as oten giusta prolongand èl segment  $AM$ . Dal pont  $M'$  i tiroma 'l ragg ch'a passa da  $F'$  e i l'oma  $M'F'A'$  omòlogh dël ragg  $AM$ .

Peui i pijoma 'l ragg che da  $A$  a passa pér el feu  $F$  e a riva an sël pian  $\pi$  ant el pont  $N$ . Sto pont a l'ha l'omòlogh  $N'$  an sël pian  $\pi'$ , che as oten giusta tirand la paralela a l'ass òtich ch'a passa pér  $N$ . El ragg emergent  $N'F'A'$  ch'a seurt da  $N'$ , omòlogh dël ragg  $AFN$  ch'a passa pér el prim feu  $F$ , a sarà paralél a l'ass òtich, e a và a crosié 'l ragg emergent  $M'F'A'$  giusta ant el pont  $A'$ , che donca a l'é, ant lë spassi imàgin, l'imàgin real dël pont ogét  $A$ .

Se i voroma trové 'l pont omòlogh dël pont  $B$  i dovroma le corispondense an 's l'ass òtich ch'i l'oma vist prima. I podoma 'dcò trovélo coma lìmit dël pont  $A$  cand la fletia ch'a arpresenta nòstr ogét a tend a zero. A l'é ciàir che ant j'ipòtesi ch'i l'oma fait, se un pian éd front a conten l'ogét  $AB$ , n'àutr pian éd front corispondent a continrà l'imàgin  $A'B'$ .

## Posission dl'imàgin e angrandiment trasversal

I vardoma adéss le fòrmule ch'a servo a stabilì la posission dl'imàgin an fonsion dla posission dl'ogét e dle carateristiche dël sistema òtich, vis-a-dì dla posission dij feu e dij pont prinsipaj.

Pér sto but a conven consideré doi sistema cartesian definì, ant l'órdin, ant lë spassi (ant el pian, an nòstra arpresentassion) ogét, che i disoma  $xy$ , e ant lë spassi (ant el pian, an nòstra arpresentassion) imàgin, che i disoma  $x'y'$ . Is arferima a figura 6. I arcordoma che pér adéss i continuoma a supon-e doi ìndes d'arfrassion pér lë spassi ogét e lë spassi imàgin che a peulo esse different (contut che i l'àbio nen dovràje ant lòn ch'i l'oma dit).




Figura 6 - Distanse e àngoj

I butoma l'orìgin dël prim sistema ant el prim feu  $F$ , con l'ass  $x$  ant la diression d'ass òtich e vers contrari a col dla propagassion dla lus e con l'ass  $y$  normal a l'ass òtich e voltà vers l'aut (pér passé da l'ass  $x$  a l'ass  $y$  a-i và na rotassion anti-oraria éd  $\pi / 2$ ). Lë scond sistema i lo pijoma con l'orìgin ant lë scond feu  $F'$ , l'ass  $x'$  an sl'ass òtich e vers concòrd con la propagassion dla lus, mentre l'ass  $y'$  a l'é normal a l'ass òtich e voltà vers el bass (pér passé da l'ass  $x'$  a l'ass  $y'$  a-i và na rotassion oraria éd  $\pi / 2$ ).

As diso distanse focaj  $f$  e  $f'$  le distanse dij pian prinsipaj dai relativ feu, contà coma positive, ant l'órdin, ant el vers dle  $x$  e dle  $x'$ .

An figura, 'l segment  $A'B'$  a l'é l'imàgin dël segment  $AB$ , cosutùa com i l'oma vist prima. La longhëssa dël segment  $AB$  a l'é indicà con  $y$  ecola dël segment  $A'B'$  a l'é indicà con  $y'$ . El valor

$G_t = \frac{y'}{y}$  a l'é dit "**angrandiment linear trasversal**", con  $y$  e  $y'$  che a l'han ël segn ch'a ven da le convention ch'i l'oma fàit.

St'angrandiment a l'é relativ a la cobia 'd pian ëd front ch'a passa pér  $A$  e  $A'$ . L'agetiv "*trasversal*" as arferiss a la diression normal a l'ass òtich. Ij pian prinsipaj a son na cobia 'd pian ëd front omòlogh, che a l'ha angrandiment  $G_t = -1$ , dal moment che  $y$  e  $y'$  a sarò istéss, tuti doi con l'istéss vers an sù opura an giù, e donca con segn contrari ant ij rëspetiv sistema d'arferiment. An general ël rapòrt  $G_t$  a coincid con ël rapòrt ëd similitùdin dij doi pian.

Se, an figura, i vardoma ij doi triàngoj *AFB* e *RFP*, i vëddoma sùbit che a son sìmij, dal moment che a l'han ij tre àangoj uguaj. Da sì a ven che:

$$\frac{y'}{y} = \frac{f}{x} \quad \text{andova } x \text{ a l'é la coordinà 'd } B$$

e pér costrussion i l'oma che  $PR = y'$ .

L'istessa còsa as peul dì pér ij triàngoj *A'F'B'* e *M'F'P'*, da 'ndova as arcava che :

$$\frac{y'}{y} = \frac{x'}{f'} \quad \text{andova } x' \text{ a l'é la coordinà 'd } B'$$

Se i andoma a sostituì ant l'espression ëd  $G_t$  i trovoma la relassion:  $G_t = \frac{f}{x} = \frac{x'}{f'}$  e da sì, moltiplicand pér  $x$  e pér  $f'$ , i otnoma che :

$$f f' = x x'$$

e costa a l'é la relassion ëd Newton, che a dis che doi pont omòlogh an sl'ass òtich a l'han ël prodòt ëd soe distanse dai feu che a l'é costant e a l'é ugual al prodòt dle doe distanse focaj (distanse dij feu dai doi pian prinsipaj).

Se adéss i dovroma l'espression ëd  $G_t$  pér arcavé  $x'$  e peui i diferensioma rispét a  $x$ , i trovoma :

$$x' = \frac{f f'}{x} ; \quad \frac{dx'}{dx} = -\frac{f f'}{x^2} \quad \text{ma} \quad G_t^2 = \frac{f^2}{x^2} \quad \text{e donca} \quad \frac{dx'}{dx} = -G_t^2 \frac{f'}{f}$$

Sòn a esprim la variassion ëd  $x'$  rispét a na variassion ëd  $x$ . As trata donca d'angrandiment d'un segment anfinitésim butà arlongh l'ass òtich.

A l'é donca ciàir che la similitùdin che a esist pér figure omòloghe su doi pian ëd front corispondent, con rapòrt  $G_t$ , a esist nen anvece pér segment paraléj a l'ass òtich, gnanca pér segment anfinitésim. I ciamoma 'l rapòrt  $\frac{dx'}{dx}$  "**angrandiment longitudinal**" e i disoma che cost a l'é anlià al quadrà dl'angrandiment trasversal.

## Angrandiment angolar

A-i son vâire cas andova l'angrandiment trasversal a l'é nen vâire significativ, e an costi cas a anteressa 'd pì ël rapòrt fra l'àngol che a fan fra 'd lor doi ragg emergent, rispét a l'àngol che a fan ij doi ragg omòlog incident.

I pijoma che un dij ragg a sia an sl'ass òtich e che donca a passa nen devià dal sistema. I consideroma peui, sempe arferendse a figura 6, èl ragg incident  $L_\infty BS$ , andova  $L_\infty$  a arpresents na diression, e donca un pont a l'anfinì. I consideroma donca l'àngol  $u$  che sto ragg a forma con l'ass òtich, e l'àngol  $u'$  che 'l ragg emergent omòlogh  $S'B'L'_\infty$  a forma sempe con l'ass òtich. Sto ragg a l'é omòlogh èd SB dal moment che a passa pér ij pont  $S'$  e  $B'$  che a son omòlogh èd  $S$  e  $B$ .

As definiss coma "angrandiment angular", ò rapòrt èd convergensa  $G_\omega$ , èl rapòrt :

$$G_\omega = \frac{\tg u'}{\tg u}$$

Pér convention as pijsa coma vers positiv pér  $u$  col che a parte da l'ass òtich, orientà coma  $x$ , a và an sens orari, mentre coma vers positiv pér  $u'$  as pijsa col che a parte da l'ass òtich, orientà coma  $x'$ , a và an sens anti-orari. I notoma che l'istéss dëscors a peul esse fàit pijand coma àngol  $u$  col fàit da doi ragg che a seurto da  $A$ , e pér àngol  $u'$  col fàit da ij doi ragg omòlogh corispondent che a seurto da  $A'$ .

Dàita 'ntlora na diression  $L_\infty$ , che sì i ciamoma pont  $L_\infty$ , i vardoma 'l ragg che a passa pér èl pont B con l'istéss diression, vis-a-dì  $L_\infty BS$ . Èl pont S an sël prim pian prinsipal, a l'ha com omòlogh  $S'$  an slë scond pian prinsipal, mentre i l'oma già vist che  $B'$  a l'é l'omòlogh èd B. Donca 'l ragg  $S'B'$  a l'é l'omòlogh dël ragg  $L_\infty BS$ .

Pér consideré n'àutr ragg che a seurta dal pont  $L_\infty$ , a basta consideré un ragg qualunque paralél a  $L_\infty BS$ , e noi i consideroma 'l ragg paralél ch'a passa pér èl feu  $F$ , vis-a-dì 'l ragg  $L_\infty FR$ . Se i vardoma 'l triàngol  $FPR$  i podoma scrive :

$$y' = f \tg u$$

andova  $y'$  a l'é la quòta dël ragg  $R'A'$  ch'a seurt dal pian  $\pi'$ .

Èl ragg paralél ch'a passa pér èl prim feu  $F$ , vis-a-dì  $L_\infty AFR$ , a l'ha coma ragg omòlogh èl ragg paralél a l'ass òtich  $R'L'A'$ , andova  $L'$  a l'é 'l pont èd crosiera con èl ragg  $S'B'$  e donca a l'é l'imàgin dël pont  $L_\infty$ . Ant la projetività che a riva da l'aprossimassion èd Gauss, l'imàgin d'un pont a l'anfinì as forma an slë scond pian focal, e donca 'l segment  $L'F$  a l'é normal a l'ass òtich.

I consideroma antlora 'l paralelograma  $F'B'A'L'$  e i podoma vèdde che la riga drita  $M'F'A'$  a forma con l'ass òtich l'istéss àngol  $u'$  che la reta  $S'B'$  a forma con l'istéss ass. Da la considerassion dël triàngol  $F'M'P'$  i arcavoma che :

$$y = f' \tg u'$$

I dividoma member a member ste doe ùltimes espressione e i otnoma :

$$\frac{y'}{y} = \frac{f \tg u}{f' \tg u'} \quad \text{donca} \quad y' f' \tg u' = y f \tg u$$

Costa a l'é la lej èd Lagrange, che an garantiss l'ortoscopìa dl'imàgin con:

$$\frac{y}{y'} = \frac{f'}{f} \cdot \frac{\tg u'}{\tg u} = \text{cost}$$

e da sì, con sempi passagi algébrich, i otnoma :

$$G_t \cdot G_\omega = \frac{f}{f'} \quad \text{e 'dcò} \quad G_\omega = \frac{f}{x'} = \frac{x}{f'}$$

I podoma supon-e che la variàbil  $x$  a peussa pijé tuti ij valor da  $-\infty$  a  $+\infty$ , e che donca  $G_\omega$  a peussa 'dcò chièl pijé tuti ij valor reaj. An particolar a esist na cobia 'd pian omòlogh che a supon-o che  $G_\omega = -I$  e che donca  $\tg u' = \tg u$ , vis-a-dì che  $u' = u$ . Sti pian as ès-ciamo "pian nodaj" e ij pont che costi a l'han an comun con l'ass òtich as diso "pont nodaj", ò pont èd neu, e a son indicà con  $N$  e  $N'$ . I l'oma arpresentàje an figura 7, andova as ilùstra 'l concèt general con ij pian nodaj ant na posission qualonque.




Figura 7 - Pont e pian nodaj

Ma se  $G_\omega = -I$  antlora  $\frac{x}{f'} = -I$  e donca  $x = -f'$ . Se i vardoma la figura i podoma deduve che  $NP = N'P'$ , e sòn dal paralelograma  $NN'SR$ .

Ij pont nodaj a l'han donca la caraterìstica che un fagg incident ch'a passa pér  $N$  a l'avrà com omòlogh un ragg emergent ch'a passa pér  $N'$  e con l'istessa anclinassion an sl'ass òtich ch'a l'ha 'l ragg incident.

Sovens as preferiss dovré, anvece dle coordinà  $x$  e  $x'$ , le distanse dij pian èd front dai rispetiv pian prinsipaj, distanse indicà con  $p$  e  $p'$ . A valo donca le relassion :

$$x = p - f \quad \text{e} \quad x' = p' - f'$$

I podoma sostituì coste espression ant la relassion èd Newton  $f f' = x x'$  e i otnoma :

$$\begin{aligned} (p - f)(p' - f') &= f f' \quad \text{donca} \\ p p' - p f' - f p' + f f' &= f f' \quad \text{vis - a - dì} \\ p p' - p f' - f p' &= 0 \quad \text{i dividoma pér } p p' \\ 1 - \frac{f'}{p'} - \frac{f}{p} &= 0 \quad \text{e da sì i arcavoma} \\ \frac{f}{p} + \frac{f'}{p'} &= 1 \end{aligned}$$

I l'oma già vist che pér un diòtr èsférich qualonque sentrà an dl'ass a val la relassion  $\frac{f}{f'} = \frac{n}{n'}$  con, al sòlit,  $n$  e  $n'$  che a son j'indes d'arfrassion dij doi mojen anans e daré al diòtr.

St'espression, com a peul esse dimostrà, a val èdcò pér un sistema comunque complicà, pijand pér  $f$  e  $f'$  e pér  $n$  e  $n'$ , ant l'órdin, ij feu prim e ùltim e j'indes d'arfrassion prim e ùltim. La dimostrassion

as oten giusta pér sostitussion considerand che, se i l'oma m diòtr, pér él diòtr i a val la relassion

$$\frac{f_i}{f_{i+1}} = \frac{n_i}{n_{i+1}}.$$

A sta mira, se i consideroma che un sistema òtich, èd sòlit, a l'ha d'ària anans e daré e che donca i l'oma che  $n = n'$ , antlora i l'oma 'dcò che  $f = f'$ . Sòn an dis che an coste condission a val la relassion :

$$\frac{1}{p} + \frac{1}{p'} = 1 \quad \text{equassion dij pont coniugà}$$

e, an sto cas, ij pian nodaj o coincido con ij pian prinsipaj.

## Formassion dl'imàgin pér na lent sutila

Da com i l'oma definì le lent sutila, a l'é ciàir che, ant l'ària, pér lor ij doi pian prinsipaj a coincido, parèj com ij pian nodaj, ij pont prinsipaj e ij pont nodaj.

### Ogét reaj

I comensoma a vardé 'l cas arpresentà an figura 8.




Figura 8 - Imàgin pér na lent sutila

La costruzione dl'imàgin dl'ogét  $V_1$  a l'é imedià. Èl ragg che a seurt da  $V_1$  paralél a l'ass òtich, rivà an sël pian  $\pi$ , a continua passand pér él feu  $F_2$ . Èl ragg che a seurt da  $V_1$  e che a passa dal feu  $F_1$ , rivà an sël pian  $\pi$ , a continua paralél a l'ass òtich. Èl ragg che a seurt da  $V_1$  e che a passa dal pont  $P_1 \equiv P_2 \equiv P \equiv N_1 \equiv N_2$ , pont che a ven ciamà "**center dël sistema òtich**", a continua nen devià. Sti ragg a concoro ant él pont  $V_2$  che a sarà l'imàgin èd  $V_1$ .

L'angrandiment linear trasversal  $G_t$  a sarà dàit, com al sòlit, da  $G_t = \frac{y_2}{y_1}$ . I podoma

esprime sto rapòrt an fonsion èd  $p_1, p_2, f$ , e pér fé sòn i vardoma ij triàngoj  $F_2PV'_0$  e  $F_2M_2V_2$ , che a son simij (istessi àngoj) e che donca a l'han ij lat an proporsion fra 'd lor :

$$\frac{y_2}{y_1} = \frac{p_2 - f}{f}$$

mentre che, pér l'istéssa rason, dai triàngoj  $F_1M_1V_1$  e  $F_1PV''_0$  as arcava che :

$$\frac{y_2}{y_1} = \frac{f}{p_I - f}$$

e donca i l'oma:

$$G_t = \frac{y_2}{y_1} = \frac{p_2 - f}{f} = \frac{f}{p_I - f}$$

Cost a l'é 'l cas dla lent convergente con l'ogét che as treuva prima dël prim feu. L'imàgin a l'é formà da ragg che a rivo da pont èd l'ogét e che a concoro, ant lë spassi imàgin ant un pont. As trata donca 'd n'imàgin real che as forma an sël pian èd front coniugà al pian èd front dl'ogét.

An figura 9 i l'oma arpresentà na lent conca, che a peussa sempe esse considerà coma na lent sutila, e donca con  $\pi \equiv \pi'$ .




Figura 9 - Lent conca

Pér trové 'l feu  $F_2$  èd costa lent i dovoma sempe vardé andova a van a converge ij ragg paraléj a l'ass òtich che a rivo da lë spassi ogét a snistra dla lent midema.

I trovoma sùbit che sti ragg emergent da la lent ant lë spassi imàgin, a van nen, coma ragg reaj, a concore ant un pont dal moment che a divergio spatarand-se ant un còno. A concoro anvece ant un pont d'ass òtich, cò dël còno, ij sò prolongament. Sto pont èd convergensa a l'é 'l feu  $F_2$ .

An efét, contut che an  $F_2$  a-i sia nen convergensa 'd ragg luminos, n'osservator che a staga ant lë spassi imàgin a vëdd dabon èl pont  $F_2$ , pérchè ij ragg a rivo a chièl pròpi coma se a fusso emëttù dal pont  $F_2$ . Pér sòn l'imàgin a l'é dita "*virtual*".

El prim feu  $F_1$  a peul esse trovà a l'istessa manera pensand dë scambié fra 'd lor lë spassi ogét e lë spassi imàgin. I notoma che la posission dij feu a l'é scambià rispét a cola dla lent convergent.

La formassion dl'imàgin as oten ancora coma prima, e pér sòn si arferima a figura 10.

I consideroma 'l ragg che dal pont ogét A a và vers la lent paralél a l'ass òtich e 'l ragg che a passa pér èl senter òtich dla lent, e donca nen devià. I trovoma 'il pont èd crosiera dë sto ragg con èl prolongament dël ragg ch'i l'oma considerà prima. Sto pont èd crosiera a l'é  $A'$ , imàgin dël pont A. Com as peul noté l'imàgin a casca ant lë spassi ogét. N'osservator che as treuva ant lë spassi imàgin e ch'a goarda la lent, a vëdd, an efét, èl pont  $A$  an posission  $A'$ , pérchè a vëdd ij ragg emergent da la lent pròpi com a seurtèisso dal pont  $A'$ . Con costa lent l'imàgin a l'é sempe virtual.




Figura 10 - Imàgin dàita da na lent conca

I arpijoma adéss èd discors an sla lent convessa e i vardoma vàire cas. I comensoma dal cas arpresentà an figura 11. Prima i l'oma vist còs a càpita cand l'ogét as treuva prima dèl prim feu, adéss i vardoma còs a càpita se l'ogét a l'é an sél prim pian focal.




Figura 11 - Ogét an sél pian focal èd na lent convessa

Se l'imàgin a l'é giusta un pont  $A$ , ij ragg ch'a seurto da  $A$  e a rivo a la lent a son devià tutti paraléj, e donca a l'avran la diressioón dla riga drita che a uniss  $A$  al senter òtich dla lent e che a l'é l'ragg nen devià. Èl pont omòlogh èd  $A$  a l'é 'l pont a l'anfinì che a corispond a costa diressioón. I podoma dì che l'imàgin as forma a l'anfinì.

Se l'imàgin a l'é la flécia dèl disegn, ògni pont dla flecia a forma soa imàgin ant èl pont a l'anfinì che a corispond a la diressioón che da chièl a và al senter òtich, fin-a al pont  $B$ , che a forma soa imàgin ant la diressioón dl'ass òtich.

I vardoma 'ncora 'l cas dl'ogét che as treuva fra 'l prim feu  $F_1$  e la lent, parèj com i l'oma arpresentsàlo an figura 12.

La lent midema a riva nen a fé converge ij ragg che a seurto dai pont dl'ogét, mentre a convergio ij proplongament èd costi ragg. L'imàgin, com as vëdd an figura, a l'é donca virtual.

L'agrandiment trasversal linear  $G_t$  a l'é dàit da :  $G_t = \frac{-y_2}{y_1} = \frac{-p_2}{p_1}$ , com as peul sùbit arcavé dai doi triàngoj sìmij  $ABP$  e  $A'B'P$ .




Figura 12 - Ogét fra feu e lent (lent convessa)

## Ogét virtuaj

A-i son almanch doi cas andova i podoma consideré d'ogét virtuaj. Un a l'é com él cas ch'i l'oma vist prima, andova però i suponoma che na sconda lent a cheuja ij ragg che a seurto da la prima lent. Is arferima a figura 13.




Figura 13 - Prim tipo d'ogét virtual

An figura, ij ragg **a'** e **b'**, che a son le deviassion dij ragg **a** e **b** ch'a seurto da l'ogét fisich, as compòrto, com i l'oma vist, coma doi ragg che a seuro dal pont virtual **A'**, e, an particolar, a son coj che a passo, ant l'órdin, pér él senter dla lent **B** e che donca a l'é nen devià, e pér él prim feu **F₁B** dla lent **B** e che donca a seurt paralél a l'ass òtich. Sti doi ragg, emergend da la lent **B**, as crosio ant él pont **A''**, che donca a l'é l'imàgin real dl'ogét virtual **A'**.

N'autra possibilità d'avèj n'ogét virtual a l'é cola d'avèj un sistema òtich dont ij ragg emergent a concoro vers n'imàgin real, ma prima 'd rivé a forméla a son intercetà da n'autra lent. I podoma pensé che l'ogét èd cost'última lent a sia col'imàgin real che an efét as forma nen, e che i podoma ciamé "ogét virtual", che a ven a trovésse ant lë spassi imàgin dl'última lent. Is arferima a figura 14.




Figura 14 - Second tipo d'ogéti virtual

Edcò ant èl cas èd figura l'imàgin che as forma a l'é n'imàgin real.

## Convergensa 'd na lent

As dis "convergensa" opura "potensa" èd na lent, l'invers èd soa distansa focal. Se la distansa focal a l'é dàita an méter, la potensa a l'é an "**diotriè**"  $D$ . Parèj, na lent con distansa focal d'un meter a l'avrà la potensa èd na diotrià. Donca :  $D = \frac{1}{f}$

I l'oma vist che a val l'equassion dij pont coniugà :  $\frac{1}{p} + \frac{1}{p'} = \frac{1}{f}$ . Se antlora i butoma che

$$P_1 = \frac{1}{p} \quad ; \quad P_2 = \frac{1}{p'} \quad ; \quad F = \frac{1}{f}, \text{ i podoma scrive che:}$$

$$P_1 + P_2 = F$$

Is arferima antlora a figura 14, andoca i suponoma che 'l segment  $AB$  a l'abia longhëssa unitària :




Figura 15 - Relassion fra posission e àngoj

Se i suponoma ch'a vala l'aprossimassion èd Gauss, i l'avroma che  $P_1 = \frac{1}{p} = \tan \alpha = \alpha$ , e a

l'istessa manera  $P_2 = \beta$  e  $F = \gamma$ .

An figura i l'oma che  $p$  a l'é negativ, e donca la relassion ch'i podoma scitive a l'é  $\beta = \alpha + \gamma$ . An costa manera i l'oma che l'invers dla distansa focal  $\gamma$  a arpresents l'àngol che un ragg a ven fait viré traversand la lent. An efét èl ragg incident a forma l'àngol  $\alpha$  con l'ass òtich, a vira èd  $\gamma$  e a emergg con àngol  $\beta$ .

## Ogét tridimensionaj

Pér n'ogét ch'a l'òma un volum, i podoma nen dovré le considerassion ch'i l'òma fàit fin-a sì. Com esempi i podoma vardé còs a càpita a n'ogét arpresentà da na fletia orisontal an sl'ass òtich, com i l'òma mostrà an figura 16.




Figura 16 - Angrandiment longitudinal anfinitésim

I l'òma già parlà èd sòn prima, cand i l'òma trovà la relassion èd Newton. Sì i arpijoma e i completema 'l discors ampréssa.

Da l'equassion èd Newton a arzulta che, cand le doe distanse focaj a son istésse (istéss ìndes d'arfrassion pér èl prim e l'ùltim mojen):

$$x' = \frac{f^2}{x}$$

Se i diferensioma costa equassion i otnoma:

$$dx' = -\frac{f^2}{x^2} dx$$

e se i consideroma nòstra fletia coma n'increment finì dla  $x$  i podoma scrive, an manera aprossimà:

$$\Delta x' = -\frac{f^2}{x^2} \Delta x$$

An Costa espression i podoma sostituì un-a 'd cole dl'angrandiment trasversal  $G_t = \frac{f}{x}$  e i otnoma che :

$$\Delta x' = -G_t^2 \Delta x$$

I definima, coma natural, "**angrandiment linear longitudinal  $G_l$** " èl rapòrt  $G_l = \frac{\Delta x'}{\Delta x}$  e così

i otnoma che  $G_l = -G_t^2$ . Sòn a dis che, gavà 'l cas èd  $G_t = \pm 1$ , an sl'ass  $x$  as manten nen la proporsionalità.

As nòta peui che  $G_t^2$  a l'è sempe positiv, e donca  $\Delta x$  e  $\Delta x'$  a son sempe 'd segn contrari. Se i consideroma la convension ch'i l'òma fàit an sij segn, i concludoma che la fletia ogét e la fletia imàgin a son voltà ant l'istéssa diression rispét al vers èd propagassion dla lus.

## Sistema afocaj ò telescòpich

Costi a son sistema con ij pian focaj a l'anfinì. Èl pian a l'anfinì dlë spassi ogét e col dlë spassi imàgin as corispondi. Sòn a veul dì che ragg ch'a intro paraléj da lë spassi ogét a seurto paraléj vers lë spassi imàgin. Sti cas a son coj djè strument che a servo a l'osservassion d'ogét motobin lontan, e donca a son ciamà "sistema telescòpich".

Pér oten-e un sistema telescòpich a basta cobié doi sistema con ij feu com i l'oma vist prima, sentréje an sl'istéss ass òtich e fé an manera che lë scond pian focal dël prim sistema a coincida con él prim pian focal dlë scond sistema.

An costa manera ij pont dël pian a l'anfinì dlë spassi ogét a l'han coma corispondent èd pont a l'anfinì dlë spassi imàgin. Is arferima a figura 17.

Se i consideroma ij ragg incident che a l'han na diression  $A_\infty$  (donca tuti ij ragg paraléj a cola diression), costi a van a formé l'imàgin ant él pont A dël pian focal comun ai doi sistema. St'imàgin a l'é real, e a fà da ogét a lë scond sistema. Dal moment che as treuva an sél prim pian focal dë sto scond sistema, a dà orìgin a ragg paraléj che a emergio ant lë spassi imàgin dlë scond sistema Ant la diression  $A'_\infty$ , che a l'é donca él pont omòlogh dël pont  $A_\infty$ .

I ciamoma  $F_1, F'_1, P_1, P'_1$  ij feu e ij pont prinsipaj dël prim sistema e  $F_2, F'_2, P_2, P'_2$  ij feu e ij pont prinsipaj dlë scond sistema. Sti doi sistema a podrò esse, pr'esempi, l'obietiv e l'ocular d'un canucial.




Figura 17 - Sistema telescòpich

Pér costrussion (e ipòtesi) ij doi feu  $F'_1, F_2$  a coincidono. Pér sti sistema i l'oma che l'angrandiment trasversal  $G_t$  e col angular  $G_\omega$  a dipendo nen da la cobia 'd pian èd front che a-j son arferì.

An efét, se  $y = y_I$  e  $y'_I$  a son, ant l'órdin, ogét e imàgin pér él prim sistema, i l'oma che  $y'_I$  a dventa l'ogét (che a podrà esse, an general, real ò virtual) dlë scond sistema. L'imàgin dlë scond sistema ch'a sia  $y'$ . J'angrandiment trasversaj dij doi sistema , ant l'órdin, a saran :

$$G'_t = \frac{y'_I}{y} ; \quad G''_t = \frac{y'}{y'_I}$$

I l'oma vist che pér l'angrandiment total a val la relassion  $G_t = G'_t \cdot G''_t$  e che donca, an nòstr cas :  $G_t = G'_t \cdot G''_t = \frac{y'_I}{y} \cdot \frac{y'}{y'_I} = \frac{y'}{y}$

Ma l'angrandiment  $G'_t$  a l'é 'dcò  $G'_t = \frac{x'_1}{f_1}$  e l'angrandiment  $G''_t$  a l'é 'dcò  $G''_t = \frac{f_2}{x_2}$ . An nòstr cas i l'oma che le coordinà  $x'_1$  e  $x_2$  a coincido, dal moment che  $F'_1$  e  $F_2$  a coincido e l'imàgin as treuva pròpi là. I l'avroma donca che :

$$G_t = G'_t \cdot G''_t = \frac{y'}{y} = \frac{f_2}{f_1}$$

che a dipend nen da la posission dl'ogét.

Lòn che pì an anteressa ambelessì a l'é però l'angrandiment angular  $G_\omega$ , dal moment che pér d'ogét e d'imàgin a l'anfinì a l'ha nen vàire sens parlé d'angrandiment linear trasversal.

I l'oma che ij doi feu  $F_1$  e  $F'_2$  a son pont coniugà rispét al sistema afocal pérchè se an  $F_1$  a-i é na sors èd ragg, costi seurto dal prim sistema paraléj a l'ass e parèj a intro ant lë scond sistema, che a-j fà converge an  $F'_2$ . Antlora, se i vardoma ij triàngoj  $F_1P_1M_1$  e  $F'_2P'_2M'_2$ , i notoma che:

$$P_1 M_1 = P'_2 M'_2 = f_1 \cdot \tan u = f_2 \cdot \tan u' \quad \text{e da sì} \quad G_\omega = \frac{\tan u'}{\tan u} = \frac{f_1}{f_2}$$

## J'aberassion geométriche

I continuoma, pér adéss, a rasoné su lus monocromàtica, ma contut che i ten-o sta posission, an pràtica a-i son vàire cas èd sistema reaj che pér lor l'aprossimassion èd Gauss a l'é trop gròssa. La lus cheuìja dal sistema bin da ràir a l'é fàita da ragg para-assiaj, dal moment che a venta che a riva lus a basta, e donca j'overture a son gròsse e parèj èdcò j'àngoj, che as peulo pì nen confonde con sò sen ò soa tangent. An coste condission l'imàgin a ven dëstorzùa rispét a l'ogét.

As dis che 'l sistema a l'ha d'aberassion, e sì i doma n'uciada a le prinsipaj èd coste, e a com as peulo arduve.

## Aberassion dë sferissità

I suponoma d'avèj un pont luminos  $M$  an sl'ass òtich coma sors, e i suponoma che sto pont a stava prima dël prim feu èd nòstr sistema che, an figura 18, dont is arferima, a l'é arpresentà da na lent convergente.




Figura 18 - Aberassion dë sferissità

Second lòn ch'i l'oma vist ij ragg a dovrò converge ant un pont imàgin ant lë spassi imàgin. Anvece a càpita che ij ragg che a passo dal bòrd dla lent (àngol gròss) a van a converge ant un pont  $M'$  che a l'é pì davzin a la lent èd lòn ch'a dirìa la teoria. Ij ragg che a passo vers êl senter dla lent (àngol cit) a convergio ant un pont  $M''$  che a l'é davzin a lòn ch'a dis la teoria. Fra un pont e l'autr a van a converge j'autri ragg.

Fra  $M'$  e  $M''$  a-i é un pont èd l'ass andova as forma un dischet luminos con la session minima, e costa a l'é l'imàgin la pì bon-a che as peul oten-e con cola lent. Pér n'imàgin ancora pì bon-a a venta, dovrànd un diaframa, fèrmé ij ragg pì periférich. Costa però a l'é n'operassion che a gavrìa luminosità a l'imàgin e donca nen sempe a l'é n'operassion possìbil.

Êl limit a l'usagi 'd diaframa a dipend dal cas spessifich. A l'é ciàir che pì as gavo ragg periférich e pì l'imàgin a dventa pì bon-a, ma 'dcò sempe pì sombra., e is avzinoma a l'aprossimassion èd Gauss.

## Aberassion èd còma

Costa aberassion a l'é dl'istéss tipo èd cola ch'i l'oma vist prima, ma a l'é dàita da l'imàgin èd pont che a stan nen dzora a l'ass òtich.

La situassion a l'é arpresentà an figura 19, andova as vëdd che slontanand ancora 'l pont da l'ass, l'aberassion a chërs arlongh la diression che a corispond a lë spostament.

Êl dischet luminos a pija na forma slongà, coma cola dle cométe e da lì a ven êl nòm èd costa aberassion.




Figura 19 - Aberassion èd còma

## Astigmatism

I suponoma 'ncora na sors  $M$  ch'a sia a na dàita distansa da l'ass òtich, ma sta vira is limitoma a un còno strèit èd ragg che a rivo an sla lent. Is arferima a figura 20.




Figura 20 - Astigmatism

Ant un sistema òtich che a l'àbia costa aberassion, ij ragg che a stan su un pian diametal as compòrto an manera diferenta rispét a coj che a stan an sël pian diametal normal. I vardoma l'esempi an figura.

Se i consideroma ij ragg che a rivo an sël diàmeter vertical dla lent, costi a van a converge ant él pont  $M'$ , e se i consideroma ij ragg che a rivo an sla lent su llinie paralele a sto diameter, costi a convergio su pont alineà a  $M'$  an orisontal. A sto livél as forma n'imàgin fàita a barëtta orisontal, com arpresentà an figura.

Se i consideroma ij ragg che a rivo an sël diàmeter orisontal dla lent, costi a van a converge ant él pont  $M''$ , pì lontan che  $M'$ , e se i consideroma ij ragg che a rivo an sla lent su llinie paralele a sto diameter, costi a convergio su pont alineà a  $M''$  an vertical. A sto livél as forma n'imàgin fàita a barëtta vertical, com arpresentà an figura.

Ëdcò ambelessì as forma peui un dischët luminos èd diàmeter mìnìm. Sto dischët e le doe barëtte a son dite psèudo-imàgin. Cola ch'as forma an  $M'$  a l'é dita "**imàgin primària**" e cola ch'as forma an  $M''$  a l'é dita "**imàgin secondària**".

## Curvadura dël camp

Se la sors a l'é nen un pont ma na figura svilupà an 's na surfassa pian-a  $S_0$ , is trovoma ant él cas èd figura 21.




Figura 21 - Curvadura dël camp

Se is limitoma a pensé a l'aberassion d'astigmatism ch'i l'oma vist sì dzora, i l'oma che la prima pseudo-imàgin as forma an 's na surfassa  $S_p$  concava vers la lent, mentre la sonda pseudo-imàgin as forma an 's na surfassa  $S_s$  convessa vers la lent. Ste doe surfasse a coincido an sl'ass òtich. Cand èl sistema a l'é anastigmàtic ste doe surfasse a coincido an posission  $S_0'$ , che però a continua a esse concava vers la lent.

## Dëstorsion

Ant un sistema òtich real, gavà quàich cas particolar, as verìfica nen che  $G_t = \frac{y'}{y} = \text{cost}$ , pér qualonque cobia 'd segment coniugà. As dis anlora che 'l sistema a l'é nen "**ortoscòpich**".

A peul capitè che  $G_t$  a chërsa con la distansa da l'ass òtich, e antlora a-i é na deformassion che as dis "**a cussinet**". Se a càpita 'l contrari che  $G_t$  a cala con la distansa da l'ass òtich, a-i é na deformassion che as dis "**a botalin**".

An figura 22 i l'ma arpresentà coste deformassion, arferendse a na figura ogét fàita da segment drít ch'as ancrasio, e a son arpresentà j'imàgin an coste doe dëstorsion.




Figura 22 - Dëstorsion

Sto tipo d'aberassion a ven sovens provocà da l'usagi ëd diafragma, che se da na part a arduvo l'aberassion dë sferissità, da l'autra a peulo provoché dëstorsion.

## L'aberassion cromàtica

Fin-a sì i l'oma rasonà an 's na lus ch'i suponìo monocromàrica, ma i l'oma vist che l'indes d'arfrassion d'un material a dipend da la longhëssa d'onda  $\lambda$  dla radiassion luminosa.

Se la lus a l'é nen monocromàtica, le radiassion luminose 'd differenta frequensa a trovran, an l'istéss material, indes d'arfrassion different, e donca un comportament different dël sistema. An efét, èl sistema a tira a scompon-e la lus e formé n'imàgin differenta pér ògni color. Ste imàgin as formo a distanse differente e con angrandiment different. An figura 23 a l'é ilustrà sto concét.




Figura 23 - Aberassion cromàtica

I accordoma com i l'oma definì 'l podèj dëspersiv èd na sostensa trasparenta :  $\omega = \frac{n_F - n_C}{n_D - 1}$

mentre an general as peul dì che  $\frac{\Delta n}{n - 1} = \frac{\Delta f}{f}$  ( i accordoma che  $n_C$ ,  $n_D$ ,  $n_F$  pér na sostansa a son j'indes d'arfrassion relativ a tre longhèsse d'onda d'arferiment: bleu, verd, ross, e che  $f$  a l'é la distansa focal).

As definiss un nùmer, ciamà "**nùmer d'Abbe  $\nu$** ", coma l'invers dèl podèj dëspersiv, donca:

$$\nu = \frac{n_D - 1}{n_F - n_C} = \frac{n - 1}{\Delta n} \quad \text{e da sì a ven} \quad \frac{\Delta f}{f} = \frac{1}{\nu}$$

e costa a l'é dita la "**dëspersion cromàtica dèl feu**", che a l'é proporsional al podèj dëspersiv  $\omega = \frac{1}{\nu}$  dèl véder dla lent. Ij doi véder ij pì comun dovrà pér le lent a son èl "**crown**" che a l'ha  $\Delta f = \frac{f}{70}$  e èl "**flint**" che a l'ha  $\Delta f = \frac{f}{20}$ .

As peulo combiné lent sèmpie fàite 'd véder diferent pér serché 'd rende mìnime coste aberassion, otnend èl feu dèl sistema ant èl pont andova le imàgin dij different color as sovapon-o. N'esempi a l'é an figura 24.

I l'oma na lent biconvessa tacà a na lent pian-conca, la prima a l'é fàita 'd véder crown e la sonda a l'é fàita 'd véder flint. l'ansema dle doe a fà na lent pian-convessa con na dàita distansa focal.

La dëspersion dla prima a ven pì ò manch compensà da la dëspersion dla sonda, an fonsion dle doe distanse focaj, e as oten na dobia lent acromàtica. La coression a l'é aprossimativa, dal moment che j'indes d'arfrassion a càmbio nen an manera linear con la frequensa. Con doe lent parèj as riva a oten-e che 'l pont èd feu a sia l'istéss pér mach doe longhèsse d'onda. Sòn as peul vèdde da la curva arpresentà an figura 25, an manera andicativa, dla variassion dla posission dèl feu an fonsion dla frequensa. La figura a paragon-a la cobia con na lent sempia, che a l'ha na dëspersion motobin pì gròssa.




Figura 24 - Coression d'aberassion cromàtica




Figura 25 - Variassion dla posission dël feu con la frequensa

Con pì che doe lent, opura dovrant materiaj pì modern, as peul fésse bastansa mej che lòn ch'i l'oma vist.

## Coression dj'aberassion geométriche

Pér j'aberassion geométriche ch'i l'oma vist prima, as trata sempe 'd trové la solussion la pì convenienta pér l'aplicassion particolar. An efét a-i é sempe 'n comproméss da trové, pérchè a càpita sovens che ël milioré n'aberassion a na pegiora n'àutra.

### Aberassiōd dë sferissità

Na prima còsa ch'as peul fé pér costa aberassion a l'é cola 'd dëstribuì bin le deviassion dij ragg fra le diferente surfasse dël sistema, an manera che ògni deviassion a sia nen trop gròssa. La figura 26 a arpòrta n'esempi con na lent pian convéssa. La prima part dla figura a ìndica còs a càpita se ij ragg, supòst paraléj a l'ass, a rivo an sla surfassa pian-a. Traversand Costa surfassa a l'ha nen èd deviassion pérchè a rivo normaj, mentre tuta la deviassion pér converge al feu a càpita an sla sonda surfassa. La conda part èd la figura a mostra còs a càpita se la prima suyfassa anteressà a l'é cola convessa. An sto cas l'istéssa deviassion vers ël feu a càpita dëstribuìa fra le doe surfasse.




Figura 26 - Dëstribussion dj'arfrassion fra surfasse

Se l'imàgin e l'ogét a son reaj, st'aberassion a peul nen esse eliminà al complét. Se anvece un sij doj a l'é virtual, a esist na cobia 'd pont particolar che a presento nen st'aberassion.

Pér dimostré sòn, i pijoma un diòtr fait da na sfera 'd véder, con ìndes d'arfrassion  $n$  e ragg  $R$ , che i suponoma ant l'aria (ìndes d'arfrassion dl'aria pijà coma 1). I pijoma peui na sors  $P$

ëd lus a pont che i suponoma distant  $R/n$  dal senter  $C$  dël diòtr. Èl pont  $P$  as treuva donca andrinta al diòtr. Sta situassion a ven a taj, com i vëwddroma, pér quàich tipo 'd microscòpi. Is arferima a figura 27.




Figura 27 - Pont èstigmàtic

Èl pont imàgin èd  $P$  a sarà  $P'$ . I pijoma coma senter èd nòstr arferiment èl cò  $O$ , opòst a  $P$  an sèl diameter ch'a lo conten. Aplicand lòn ch'i l'oma vist i l'avroma (sempe considerand le convention an sij segn) :

$$p = -\left(R + \frac{R}{n}\right) \quad \text{vis - a - dì} \quad \frac{R + p}{R} = -\frac{1}{n}$$

Dal triàngol  $PBC$  i l'avroma che (teorema dij sen):

$$\operatorname{sen} i = -\frac{1}{n} \operatorname{sen} u$$

ma a venta 'dcò ch'a sia :

$$n = \frac{\operatorname{sen} i'}{\operatorname{sen} i} \quad \text{e donca} \quad \operatorname{sen} i' = n \cdot \operatorname{sen} i$$

Comparand j'espression sì dzora as oten sùbit che :  $i' = -u$ . Ij doi triàngoj  $P'BC$  e  $PBC$  a son simij pérchè a l'han l'àngol an  $C$  an comun, l'àngol an  $B$  dël prim triàngol a val  $i'$  dal moment che a l'é opòst al cò èd  $i'$ , donca a val  $u$  com i l'oma pen-a vist, che a l'é l'àngol an  $P$  dle scond triàngol. Sòn a dis che a son uguaj èdcò ij doj àngoj an  $P'$  dël prim triàngol e an  $B$  dlë scond triàngol, vis-a-dì :  $i = u'$  e donca  $\operatorname{sen} u' = \operatorname{sen} i$ .

Se adéss i andoma a sostituì ant l'espression  $\operatorname{sen} i = -\frac{1}{n} \operatorname{sen} u$  lòn ch'i l'oma trovà i

$$\operatorname{sen} u' = -\frac{1}{n} \operatorname{sen} i' .$$

I arpijoma 'ntlora 'l triàngol  $P'BC$ , i ciamoma  $x$  èl lat  $P'C$  e i aplicoma 'l teorema dij sen:

$$\frac{\operatorname{sen} u'}{R} = \frac{\operatorname{sen} i'}{x} ; \quad x \frac{\operatorname{sen} u'}{R} = \operatorname{sen} i' ; \quad x = \frac{\operatorname{sen} i'}{\operatorname{sen} u'} R ; \quad x = -nR$$

Se i voroma trové la posission èd  $P'$ , e donca 'l valor èd  $p'$ , i arcavoma, con le sòlite convension an sij segn.

$$p' = R + n \cdot R$$

El pont  $P'$  a stà a snistra 'd  $P$ , e donca a l'é n'imàgin virtual. La distansa  $p'$  a dipend nen da l'àngol  $u$ , e tuti ij ragg che a seurto da  $P$  a l'han un ragg coniugà che a passa da  $P'$ .

Ij doi pont  $P$  e  $P'$  a son na cobia coniugà che a presenta nen l'aberassion dë sferissità. Pér ogni ass che a passa dal sènter  $C$  a-i é na cobia 'd pont parèj.

Sta proprietà a l'ha n'aplicassion amportanta ant ij microscòpi, che i vöddroma anans.

## Aberassion èd còma

Pér arduve sto tipo d'aberassion as peul serne na combinassion èd ragg èd curvadura convenient pér ij diòtr dël sistema, darmagi che lòn ch'a arduv st'aberassion a aumenta cola dë sferissità. in ch'a l'é possibil as peulo dovré 'd diaframa, che a arduvo tute doe ste aberassion ma, com i l'oma già dit, a venta ten-e cont dla luminosità necessaria, che a buta un lìmit a l'usagi dij diaframa. N'autr lìmit a l'é dàit dal fàit che ij diaframa, com i l'oma vist, a antroduvo dëstorsion.

As peul noté che 'l diòtr èsférich ch'i l'oma vist prima, a presenta nen aberassion èd còma pér ij pont stigmàtic, che a ven-o ciamà "*pont aplanàtic*".

## Astigmatism e curvadura dël camp

Pér coste aberassion a ventrà fé coincide le surfasse  $S_p$  dla prima imàgin e  $S_s$  dla sonda imàgin (figura 21), an sla surfassa  $S_0'$ , che a soa vira a dovrà esse pian-a. St'arzultà a peul esse trovà dovrànd lent múltiple e quàich diaframa, accordand sempe quaj ch'a son ij lìmit pér l'usagi dij diaframa.

*Pagina lassà veuida apòsta*

## FIBRE ÒTICHE

Contut che as trata 'd un sogéit different da col èd prima, i arpijoma lòn ch'i l'oma dit ant la prima part, e i tratoma, ambelessì, le fibre òtiche da la mira dl'òtica geométrica e donca dij ragg. I stoma macassia sempe ant l'aprossimassion parassial.

### Guide 'd lus

An general i podoma di che la lus a peul essa portà da un pòst a n'àutr sensa che as perda pèr la strà, con na série d'element coma a podrò esse lente o spécc o tuti doi j'element, sercand èd ten-e un fass consentrà 'd ragg, com a l'é schematisà an figura 28, ma a l'é sùbit ciàir che ste manere a son nen pràtiche, an particolar se la lus a venta ch'a fasa un përcors qualonque fra doi pont qualonque a na distansa che a podrò esse gròssa.

Peui a càpita che jë spécc a arbato nen tut la lus ma a na assòrbo 'dcò, e che le lente a trasmètto nen tut la lus, ma a na assòrbo e a na arbato 'dcò, an manera che l'attenuassion a sarà pitòst àuta, an particolar se j'element èd guida a son tanti.




Figura 28 - Guida 'd lus a lente e spécc

### Fibra òtica a scalin d'indes d'arfrassion

Un sistema pèr guidé la lus sensa che as verifico gròsse pèrdite a l'é col che a sfruta l'arfrassion total a la surfassa fra doi mojen different. La solussion la pì sempia da studié a l'é cola èd na fibra cilìndrica 'd veder con un dàit ìndes d'arfrassion  $n_1$ , che a arpresents l'ànima dla fibra, con antorna n'anvlup a coron-a cilìndrica con n'àutr e convenient ìndes d'arfrassion  $n_2$ .

La figura 29 a arpòrta costa solussion, considerand che la fibra a peul esse flessibil.




Figura 29 - Fibra òtica con ìndes a scalin

Fra 'd lor j'ìndes d'arfrassion a son ant la relassion  $n_2 < n_1$ . Ij ragg èd lus che a viagio drinta l'ànima a ven-o d'autut arbatù cand a rivo al bòrd dl'anvlup, se l'àngol d'incidensa j (misurà da la normal a la surfassa) che a val  $\varphi = 90 - \theta$ , a l'é pì gròss dl'angol crìtich  $\varphi_c$  che a val

$\varphi_c = \arcsin \frac{n_2}{n_1}$ . Antlora tuti ij ragg che a fan con l'ass dla fibra n'àngol  $\theta = 90 - \varphi$ , tal che  $\theta < \theta_c$ ,

andova  $\theta_c = \arccos \frac{n_2}{n_1}$ . a resto confinà ant la fibra, e a peulo viagé pér desen-e 'd chilòmetro.

Se la fibra, che a l'é flessibil, a cambia diression, antlora un ragg che a fussa al lìmit a podrià esse pì nen confinà. An efét a l'angol  $\theta$  fait con l'ass dla fibra as gionta l'àngol èd deviassion  $\alpha$  che la fibra a fà fra doi arbatiment consecutiv, com arpresentà an figura 30.




Figura 30 - Fibra curvà, efét an sl'àngol lìmit

A l'é facile rendse cont che sto fai a l'é giusta marginal, dàite le dimension  $d$ ,  $s$ ,  $R$ . An efét èl diàmeter d dl'ànima dla fibra a peul esse ant l'ordin dij décm èd milim mentre 'l ragg èd curvadura a l'é antorna a la desen-a 'd centim. A fé quat cont as treuva che l'àngol  $\alpha$  a l'é trascuràbil.

## Fibra òtica a ìndes gradual

I consideroma adéss na fibra fàita dal sòlit cilinder èd véder, dont l'índes d'arfrassion a l'é fonsion dla distansa da l'ass. I mantnoma sempe l'aprossimassion parassial e i accordoma j'equassion che a la goerno, ch'i l'oma vist ant la prima part :  $\frac{d}{dz} \left( n \frac{dx}{dz} \right) = \frac{\partial n}{\partial x}$  ;  $\frac{d}{dz} \left( n \frac{dy}{dz} \right) = \frac{\partial n}{\partial y}$ .

I suponoma che la fonsion che an dà l'índes d'arfrassion  $n$  an fonsion dël ragg dla fibra (an fonsion èd  $x$  e  $y$ , considerand l'ass dla fibra coma ass  $z$ ) a sia  $n^2 = n_0^2 \left[ 1 - \alpha^2 (x^2 + y^2) \right]$  e i podoma sostituì costa espression anr j'equassion sì dzora, suponend prima che  $\alpha^2 (x^2 + y^2) \ll 1$  pér tuti ij valor d'interésse èd  $x$  e  $y$ . I otnoma :

$$\frac{d x^2}{d z^2} \approx -\alpha^2 x \quad ; \quad \frac{d y^2}{d z^2} \approx -\alpha^2 y$$

Ste fonsion a son fonsion armòniche èd  $z$ , con un perìod èd  $2\pi/\alpha$ . Le condission inissiaj a son dàite da posission  $(x_0, y_0)$  e angoj  $\theta_{x0} = (dx/dz)_{z=0}$  e  $\theta_{y0} = (dy/dz)_{z=0}$ . Dàita la simetria sircolar, i podoma pijé  $x_0 = 0$  sensa che a cambia gnente. I otnoma che:

$$x(z) = \frac{\theta_{x0}}{\alpha} \sin \alpha z \quad ; \quad y(z) = \frac{\theta_{y0}}{\alpha} \sin \alpha z + y_0 \cos \alpha z$$

J'equassion s' dzora a dëscrivo la trajetòria dij ragg, dàite le condission èd partensa. I l'oma già suponù che a sia  $x_0 = 0$ , e adéss i suponoma 'dcò che a sia  $\theta_{x0} = 0$ , an manera che 'l ragg a intra an nòstra fibra an sël pian  $y$ - $z$ . Soa equassion a sarà  $y(z) = \frac{\theta_{y0}}{\alpha} \sin \alpha z + y_0 \cos \alpha z$  mentre  $x(z) = 0$  e la coordinà  $x$  a resta sempe a zero, ël ragg a resta an sl pian meridian e a ossila antorna a l'ass  $z$  con un périod èd  $2\pi/\alpha$ , com a l'é indicà an figura 31. Se le condission inissiaj a son che  $\theta_{y0} = 0$ , e che  $\theta_{x0} = \alpha y_0$ , antlora i l'oma le doe equassion

$$x(z) = y_0 \sin \alpha z ; \quad y(z) = y_0 \cos \alpha z$$

che a son j'equassion èd n'élica sircolar antorna a l'ass  $z$ . Con diferente condission inissiaj a-i son tute le diferente solussion fra coste doe.




Figura 31 - Ragg èd luss ant na fibra con ìndes n gradual

## Duvertura numérica

I suponoma d'avèj prima na fibra con ìndes d'arfrassion a scalin, coma cole viste prima, con  $n_1$  pér l'ànima e  $n_2$  pér l'anvlup, e peui na fibra con ìndes d'arfrassion gradual, che a l'abia un profil coma col ch'i l'oma vist prima :  $n^2 = n_0^2 [1 - \alpha^2 (x^2 + y^2)]$ . Ant lë scond cas ël ragg èd la fibra a l'é  $a$  (ant ël prim cas a l'é nen amportant pér nòstra costion).

I consideroma che a-i sia un ragg èd lus che a riva da l'ària (donca con n'ìndes d'arfrassion  $n = 1$ ) ant ël senter dla surfassa 'd base dla fibra, con un dàit àngol  $\theta_a$  con l'ass dla fibra, com a l'é mostrà an figura 32.

Is ciamoma, ant ij doi cas, col ch'a l'é l'àngol  $\theta_a$  màssim pér che 'l ragg a peussa intré ant la fibra e propagésse restand confinà ant l'ànima dla fibra. Sòn a definiss un paràmeter, che a ven dit "**duvertura numérica DN**" dla fibra, dàit dal valor èd  $\sin \theta_a$ .

Ant ël prim cas i l'avroma che l'àngol  $\theta$  a peul nen superé 'l valor èd  $\theta_c = \arccos(n_2/n_1)$ , mentre la relassion fra  $\theta_a$  e  $\theta_c$  a sarà (lej dë Snell-Descartes)  $n_2/1 = n_2 = \sin \theta_a / \sin \theta_c$ .




Figura 32 - Duvertura numérica.

Butand ansema sti doi fàit, e fasend ij cont (che sì i stoma nen a fé), as treuva che :

$$DN = \sin \theta_a = \sqrt{n_1^2 - n_2^2}$$

Ant ël cas d'indes gradual, as peul dimostré (còsa ch'i foma nen) che a val la relassion:

$$DN = \sin \theta_a \approx n_0 a \alpha$$

con  $n_0$ ,  $a$ ,  $\alpha$ , che a son coj ch'i l'oma definì prima.